

Schmid giavischa da midar la taglia per holding

Nova iniziativa parlamentara

■ (anr/vi) **Novas reglas per taglias sin interpresas da holding pretenda Martin Schmid (pId/GR) en sia nova iniziativa parlamentara. El na veglia betg sbassar anc dapli la taglia d'interpresas, sincerescha il cusseglier dals chantuns.**

«Refar il sistem da taglia» è il titel da l'intervenziun che Schmid ha inoltrà il davos da la sessiun da stad. «La Svizra stat gia daditg sut squitsch pertutgant l'imposiziun da taglia d'interpresas», di Schmid a l'anr. L'UE crititgeschia l'imposiziun da holding. Sche la Svizra n'interprendia nagut, pudessi dar mesiras da retorsiun, sco per exempel dapli dazi sin rauba d'export svizra. L'Italia observa spezialmain co che la Svizra agheschia. Mesiras da l'Italia avessian cunzunt consequenzas per il Tessin ed il Grischun.

Dar ina resposta efficazia a l'UE

Il sistem da taglia muntia bler per l'economia svizra, argumtescha Schmid en sia intervenziun. Per restar competitiv sin champ internaziunal – e cunzunt per rinforzar il potenzial d'innovaziun d'interpresas, stoppia la Svizra sviluppar ad



Martin Schmid

uras ed a moda autonoma il sistem da taglia.

Concret pretenda Schmid d'introducir novas reglas per «tschertas interpresas», pia quella da holding. Las novas reglas duain cumpletter la lescha d'armonisaziun da taglia e suentar ina fasa transitorica remplazzar l'imposiziun particulara da questas interpresas. «Questa novaziun en il sistem da taglia svizzer duai lubir ina resposta efficazia a l'UE pertutgant la lunga disputa da taglia.»

Ni sbassar ni dauzar taglia

L'iniziativa n'haja da far nagut cun l'autra disputa pertutgant fu-

gitivs da taglia da la Germania che deponian daners nairs sin bancas svizas. Sia iniziativa s'occupa mo da la taglia d'interpresa, di Schmid. La finamira saja da mantegnair in dretg da taglia attractiv senza che la Svizra haja da temair repressiuns da l'exteriur.

Trais suttascripziuns ha Schmid rimnà per sia intervenziun. Suttascrit han *Pirmin Bischof* (pcd/SO), *Hannes Germann* (pps/SH) e *Werner Luginbühl* (pbd/BE – ina collavuraziun burgaisa. Sanesters u verds n'haja el betg dumandà da suttascriber, lezs sajan persunter d'auzar taglias.

Schmid sincerescha dentant era a l'anr ch'el n'haja betg l'intenziun da sbassar puspè la taglia d'interpresa. Sia iniziativa na menziuneschia aposta nagliur il pe da taglia.

Il 2008 aveva il suveran svizzer lubi la refurma da taglia sin interpresas II.

Il cussegl federal aveva già empermess avant la votaziun che la refurma chaschunia be paucas sperditas da taglia. La finala ston ils chantuns e la confederaziun prender en cumpra sperditas da pliras milliardas francs entras la refurma.